

fundens amplexabatur, atque osculabatur caput ejus, a quo per pietatem erga ipsum remota erat inauguratio in regnum paternum.

71. Recepitque consiliarios senes, quorum ora, ficuum instar ramis tectarum, longis barbis deformia erant, atque qui blandis oculis eum salutabant, dulcique voce de salute ejus percontabantur.

72. “Hicce est calamitatis meæ socius, simiorum in *Riksha* monte dominus, et hic *PULASTYADES*, in prima acie pugnans.” Ita a *RAGHUIDA* venerabundo indicatos ambos prætermittens *BHARATAS LAKSHMANAM* salvere jussit.

73. Deinde cum *SUMITRIDA* propius congressus, illum inclinato capite adstantem erexit, vehementerque amplexus est, dolorem faciens quasi pectori illius suo pectore, quod vulneribus, in pugna cum *INDRAJITE* acceptis, occalluerat.

74. Tum simiorum exercitus duces, a *RÁMA* jussi, corpora humana induentes, elephantos ascendebant, in quibus, larga liquoris flumina effudentibus, eandem voluptatem capiebant, ac si montem ascendissent.

75. *VIBHÍSHANÁS* etiam, *Rákshasorum* dominus, cum comitibus suis, *DASARATHIDA* jubente, currus ascendit, qui in artificioso partium splendore ne ab ipsius quidem curribus, quamquam magica arte factis, æquabantur.

76. *RAGHUIDARUM* princeps una cum fratribus minoribus iterum ascendit currum cœlestem, volitante vexillo instructum, ad ejus nutum procedentem; veluti luna, stellarum domina, per conjunctionem cum *BUDHA* et *VRIHASPATE* conspicua, ascendit vespertinam nubium copiam, micante fulmine distinctam.

77. Ibi *BHARATAS* venerabatur lætam filiam *Mithilensem*, quam *RÁMAS* e *RÁVANÆ* periculo servaverat, veluti mundorum dominus terram servabat e diluvio, seu veluti temporis pluvii abitus lunæ splendorem liberat a nubium copia.

78. *JANAKÆ* filiae pedum par celebrandum, quod repudiatis *Lankæ* domini blandimentis fidem suam servaverat, probique *BHARATÆ* caput,